



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

### **Ein Widerruf vom Fegefeuer**

**Luther, Martin**

**Wittemberg, 1530**

**VD16 L 7544**

Allen unsern nachkommen / Martinus Luther.

**urn:nbn:de:hbz:466:1-33177**

2

# Allen vnsern nachfo- men / Martinus Luther.

**N**ad vnd friede ynn  
Christo vnserm Derrn / Weil ich  
sehe / das die Sophisten mit al-  
lem vleis / ihr lügenpredigt / schan-  
de vnd grewel / da mit sie die Chris-  
stenheit verderbt haben / itzt  
durch viel geplerr vnd geschrey  
vnter stehen zuerbergen / vnd  
sich erfur putzen / als hetten sie noch nie kein vn-  
thetlin begangen / Der hoffnung / weil wir eine zeit  
lang daher gegen sie geschwigen / vnd vns mit den  
rotten geistern geschlagen / sie wolten inn des da-  
her schleichen / vnd aus ihrem schandloch erfur  
sich nutzen / das man all ihr lesterlichs leren vnd  
wesen vergessen solle / vnd wollen also vngebüffet /  
vngebessert / dazu vnuersehens vnd vnuerschampt /  
mit der zeit / alle ihre Teuffels lere widder anrich-  
ten / So mus ich dagegen widderumb das alte re-  
gister erfur ziehen / vnd ihre löbliche tugent widder  
an die sonnen bringen / das sie nicht so schwartz  
verfaule / sondern wol gebleicht werde / damit man  
ihr nicht so vergesse / wie sie hoffen.

Denn weil die verzweinelten lesterer vnd mör-  
der / teglich viel bluts vergiessen / liegen vnd triegen /  
A 4 Gott

Gott aber nicht so viel ehre thun wöllen / das sie doch etliche stücke (die sie selbs wissen vnd fülen / wie sie darinn geirret vnd die welt betrogen haben) bekenneten / büßeten / oder besserten / Ja nicht inn ein stück wöllen sie weichen / Sondern wöllen schlecht lieber durch sünde inn den heiligen geist / zu trotz der warheit vnd Gott selbs / öffentliche vñ von ihn selbs wol erkante lügen schützen / verteidigen vnd handhabē / vnd darüber alle die / so solchen öffentlichen lügen / als artickeln des glaubens nicht folgē / morden / brennen / verfolgen / wüten / toll vnd töricht sein. So mus ich / vnsern nachkommen zur warnung (ob die welt ia solt noch lenger stehen) ein register vnd vorrat zur Historien stellen / darinn sie sehen / warüber der Luther vom Pappst verdampt sey / vnd was des heiligen Pappstums lere gewesen sey / auff das sie sich dafür wissen zu hüten / wenn Gott die gnade gibt.

Versehe mich auch gantz tröstlich / das ich hie mit den Sophisten selbs werde einen sonderlichen dienst thun / weil ihn so aus der massen itzt wol ist / vnd die haut so seer incket / vñ mir villeicht fast feind sind / das ich sie bis her nicht recht vnd gnug gemalet habe / sondern allein auff ein papir schlecht abgerissen / Vnd derhalben begeren / ich solle sie auch mit der farben austreichen / des helffe mir Gott / vnd erhöre ihr begeren / Ich wils versuchen / vnd widderumb alles vnd alles von newen vnd forn anfahen / Vnd weil die reinen heiligen nicht wissen

wissen/warumb sie doch so schreien / wil ich ihn  
dazu helffen vnd zu schreien geben/ So mir Gott  
das leben gan. Vnd zum anfang / wil ich das Seg-  
feuer zu erst fur mich nemen / ihre schendliche lü-  
gen eraus zu setzen/denn ich bis her da widder nie  
nichts sonderlichs geschriebē habe/Vnd darnach  
von den andern lügen vnd geweltn inn der riego  
vnd ordnung nacheinander her.

Don der Sophisten lügen vnd  
gewel/mit dem Segfeuer.

## Das erst Capitel.

**S**ie haben einen Text/  
der fast ihr eckstein vnd bester  
grund ist. 2. Machabeorum. 12.  
der lautet also.

Judas aber / der Ehrn vhe-  
ste / samlet eine steure / vnd schickt  
hin gen Jerusalem zwelff tau-  
sent drachmas silbers / das man opffern solte fur  
die sunde der verstorbenen / als der von der todten  
aufferstehen / eine rechte vñ Göttliche meinung hat-  
te / Denn wo er nicht geglenbt hette / das die / so er-  
schlagen waren / wurden aufferstehen / were es ver-  
geblich vnd vnnütz anzusehen gewest / fur die tod-

Das ist / tau-  
sent vnd  
funff hun-  
dert gülden.  
Eine drach-  
ma ist funff  
schwerd gros-  
schen / odder  
xxx. lewen  
pfennige  
Meissenisch.

2 iij ten zu